



'Doista si me pitao o velikoj stvari. Ona je lahka onome kome to Allah olakša

Prenosi se od Mu'aza b. Džebela, radijallahu anhu, da je rekao: "Rekao sam: 'Allahov Poslaniče, obavijesti me o djelu koje će me uvesti u Džennet, a udaljiti od Vatre.' On reče: 'Doista si me pitao o velikoj stvari. Ona je lahka onome kome to Allah olakša: Robuj Allahu i nikoga Mu ne pridružuj, obavljaj namaz, udjeljuj zekat, posti ramazan i hodočasti Ka'bu.' Zatim reče: 'Želiš li da te uputim na vrata dobra: Post je štit, sadaka gasi grijeh kao što voda gasi vatru, kao i namaz čovjeka u dubokoj noći.' Tada je proučio: '... bokovi njihovi se postelja lišavaju...', pa je učio sve dok nije došao do riječi: '... za ono što su činili.' (Es-Sedžda, 16-17.) Nakon toga je rekao: 'Želiš li da te obavijestim o glavnoj stvari, njenom stubu i njenom vrhuncu?' Rekoh: 'Naravno, Allahov Poslaniče.' On reče: 'Glavna stvar je islam, njegov stub je namaz, a vrhunac je džihad.' Zatim reče: 'Hoćeš li da te obavijestim o onome čime ćeš sačuvati sve ovo?' Rekoh: 'Naravno, Allahov Poslaniče.' On se dohvati za jezik i reče: 'Čuvaj ovo.' Rekoh: 'Allahov Vjerovjesniče, pa zar ćemo i za govor biti pitani?' Odgovori mi tada: 'Dabogda te majka (ne) izgubila! Pa zar će ljude u Vatru išta drugo baciti na njihova lica (ili je rekao: 'noseve') do plodovi njihovih jezika!?"

[صحيح] [رواه الترمذي]

Muaz ibn Džebel nam kazuje: "Bio sam s Poslanikom, sallallahu alejhi ve sellem, na jednom putovanju. Dok smo tako putovali, približio sam mu se i rekao: 'Allahov Poslaniče, obavijesti me o djelu koje će me uvesti u Džennet i udaljiti od Vatre.'" Poslanik mu odgovori: "Pitao si me o djelu koje jako teško pada čovjeku, no ono je ipak lagano onome kome to Allah olakša. Obavljaj obaveze islama!" Prvo: da samo Allaha obožavaš i nikoga Mu ne pridružuješ. Drugo: obavljanje namaza što obuhvata pet obaveznih namaza tokom dana i noći: sabah, podne, ikindija, akšam i jacija; sa svim njihovim šartovima, ruknovima i vadžibima. Treće: davanje obaveznog zekata. To je obavezni materijalni ibadet, daje se iz određenih vrsta imetka. Daje se na svaki imetak koji dostigne šerijatski određenu količinu onima koje je šerijat precizirao. Četvrto: post mjeseca ramazana. Neophodno je suzdržati se od jela, pića i ostalih stvari koje kvare post od pojave zore do zalaska Sunca, s namjerom obožavanja Allaha na taj način. Peto: da obaviš hadž, s namjerom obožavanja Allaha. Poslanik, sallallahu alejhi ve sellem, nakon toga reče: "Zar ne želiš da te uputim na ono što ti otvara kapiju svakog dobra?! Nakon ovih dužnosti, radi i određena dobrovoljna djela!" Prvo: dobrovoljni post. On čovjeka štiti od grijeha tako što mu reducira strasti i umanjuje snagu. Drugo: dobrovoljna sadaka. Ona gasi grijeh i briše njihove tragove. Treće: Noćni namaz u posljednjoj trećini noći. Zatim je Poslanik, sallallahu alejhi ve sellem, proučio riječi Uzvišenog Allaha: "Bokovi njihovi se postelja lišavaju", tj. ustaju iz kreveta, "i oni se Gospodaru svome klanjaju", tj. obavljaju

namaz, čine zikr, uče Kur'an i uče dove, "iz straha i želje, i dio onog što im Mi dajemo udjeljuju. I niko ne zna kakve ih, kao nagrada za ono što su činili, skrivene radosti čekaju", tj. radosti koje ih čekaju na onome svijetu. Zatim je rekao, sallallahu alejhi ve sellem: "Hoćete li da vas obavijestim o glavnici vjere, njenom stubu na kojeg se oslanja i njenom vrhuncu?" Mu'az, r.a., tada je rekao: "Naravno, Allahov Poslaniče." Poslanik, sallallahu alejhi ve sellem, tada je rekao: "Glavnica vjere jeste islam", odnosno kelimei šehadet koji kada čovjek prihvati, prisvojio je temelj vjere; "njen stub je namaz", tj. nema islama bez namaza, kao što nema kuće bez stuba. Vjera onoga ko klanja postaje jaka i čvrsta; "a njen vrhunac je džihad", u borbi protiv neprijatelja vjere radi uzdizanja Allahove riječi. Zatim je rekao, sallallahu alejhi ve sellem: "Hoćeš li da te obavijestim kako da učvrstiš i popraviš ono što je prošlo?" Tada je Poslanik, sallallahu alejhi ve sellem, uzeo svoj jezik i rekao: "Čuvaj ovo i ne govori o onome što te se ne tiče." Mu'az je upitao: "Zar će nas Allah pozvati na odgovornost i kazniti zbog svega što kažemo?" Poslanik, sallallahu alejhi ve sellem, odgovorio je: "Majka te izgubila!" - nije time mislio da ga prokune, već je to izraz kod Arapa kojim se želi skrenuti pažnja na nešto što bi osoba trebala znati i na šta bi trebala obratiti pažnju. Zatim je dodao: "a zar će ljude bacati u Džehennem na njihova lica osim onoga što su posijali njihovi jezici?"

<https://www.sunnah.global/hadeeth/bs/show/66530>

النجاة الخيرية
ALNAJAT CHARITY

